



Dasar baik kerajaan terdahulu akan diteruskan – Anwar

Rafidah Mat Ruzki, Muhammad Yusri Muzamir dan Irwan Shafrizan Ismail
Disember 5, 2022 @ 4:10pm

PUTRAJAYA: Datuk Seri Anwar Ibrahim memberi jaminan dasar dirangka pentadbiran terdahulu serta Rang Undang-undang (RUU) yang masih di peringkat perbahasan ketika Parlimen dibubarkan, akan diteruskan jika ia baik dan tidak bermasalah.

Kata Perdana Menteri, ia termasuk RUU berkaitan Dasar Generasi Penamat (GEG) yang dibawa Kementerian Kesihatan (KKM) dan RUU Kawalan Produk Tembakau dan Merokok 2022 yang sebelum ini dibentangkan Menteri Kesihatan ketika itu, Khairy Jamaluddin.

Beliau menjelaskan, ia berikutan kerajaan yang ada sekarang bukanlah kerajaan yang baru ditubuhkan, sebaliknya kerajaan bagi meneruskan sistem yang ada, namun akan lebih tegas dalam membuat perubahan.

"Yang baik, perjanjian baik, kontrak yang baik, tidak ada masalah, kita akan ikut. Jika jelas umpamanya tender tu berbilion (ringgit) tidak ikut perolehan atau projek yang diluluskan berbilion, ratus bilion tidak ikut tender, tidak ikut proses, tentu kita harus teliti semula.

"Ini bukan wang saya, ini wang rakyat," katanya pada sidang media selepas mempengerusikan mesyuarat khas Kabinet di Bangunan Perdana Putra, di sini, hari ini.

Yang turut hadir, dua Timbalan Perdana Menteri, Datuk Seri Dr Ahad Zahid Hamidi dan Datuk Seri Fadillah Yusof serta Ketua Setiausaha Negara, Tan Sri Mohd Zuki Ali.